

## ■ REGENZA

# Gulivaziun da finanzas – tema e spetga

■ (anr/gc) **Tar l'inscunter dad ier – da la regenza cun ils represchentants da las medias – èsi ì principalmain per la gulivaziun federala da finanzas tranter chantuns-donateurs e chantuns-retschaviders. Cun quella haja il parlament federal da s'occupar. Il cussegl federal ed il cussegl naziunal èn per reducir quest import per 360 milliuns. Il cussegl dals stans na vuless savair nagut da quai.**

La maioritad dals chantuns-retschaviders ha dentant cuntanschì tar ina conferenza ina cunvegnyentscha da reducir l'import sin la mesadad da 360 milliuns, pia sin ca. 180 milliuns. Uschia survegness il Grischun 7,5 mil-

liuns pli pauc enstagl dad in minus da 14–15 milliuns tenor la proposta dal cussegl federal e dal cussegl naziunal, pia be anc la mesadad.

Il chantun Grischun spetga perquai fitg – sco anc auters 18 chantuns – ch'il parlament federal entria sin la proposta da cumpromiss da bleras regenzas chantunalas che prevedess da reducir l'entira summa a disposiziun per la gulivaziun da 360 milliuns be per 180 milliuns.

### Bunas frequenzas a Milano

Sco quei che la regenza ha respundi fetschia il chantun Grischun – ensemen cun l'Uri, Tessin e Vallais – part da l'ex-

ponat «San Gottardo» (Acqua per l'Europa) a l'Expo Milano. Quest pavigliun carmalia bler public. Il reliev ord granit dal Gottard dettia ina buna impressiun – saja pitschen, ma l'idea oraifra. Sin il spazi gist dasperas vegnia mussà bleras infurmaziuns, er en maletgs e films sur dal Grischun (deplorablmain nagut per rumantsch, mia remartga).

L'emna proxima, il di da las autoritads chantunalas, vegnan tant la regenza grischuna sco il cussegl grond cun ca. 100 deputads e deputadas a render uffizialmain visita a l'Expo Milano. I dettia là in pitschen act uffizial. Da quai sa legrian ins fitg.